

Politiconan mes a haci difícil pa haya candidatonan serio

FALTA dos dia mas pa partidonan politico cu kier participa n'e proceso electoral di dia 6 di December proximo y ta un realidad cu e probabel cantidad di 12 partido cu lo participa n'e proceso aki, ta confrontando problema serio pa haya candidato pa subi lista di December venidero.

Esaki no ta prome eleccion cu tin partido cu no por convence candidatonan bon prepara, bon studia y specialistanan riba un of otro tereno, pa subi lista p'asina nan por forma parti di un gobierno pa ehecuta un programa di gobernacion cu ta na bienestar di henter e pais.

No solamente cu no ta hayando candidatonan studia y bon capacita pa subi lista pero tin di e candidatonan aki cu a dicidi di bandona politica pa sigui cu nan carera profesional ya cu e arena politico no a bira loke nan a spera di dje.

P'e proceso electoral di proximo December, a bira mas difícil pa convence especialista y expertonan pa bin duna un aporte den desaroyo di e pais ya cu pa loke ta bay e historia di politica drenta e siglo aki, politico a haya ta bon di aplica un arma cu yama '*corupto*' contra di nan contrincantenan y esaki a bira di mas y ta pone cu poco hende capacita y bon prepara, kier pasa den e lodo politico cu a ser crea a lo largo di tempo.

Manera ta un tradicion caba den politica di Aruba, diahuebs anochi algun ora prome cu entrega di lista, lo tin partidonan cu ta trata di convence ciudadanonan pa subi nan lista, hendenan cu no tin experiencia politico y ta hendenan cu no sa con pa hiba un campaña pa logra un sosten amplio ni pa nan y ni pa nan partido.

Ya pa eleccion na 2021, ta solamente dos partido a presenta un lista cu 29 candidato cu ta partido MEP cu a logra un total di 20701 voto y partido AVP cu a logra acumula un sosten di 18336 voto total.

Solamente dos otro partido a presenta un lista cu a supera mas cu 15 candidato cu ta PPA cu a presenta 17 candidato di cual e lider a ricibi 943 voto personal, sigui pa un solo candidato mas cu a supera e cantidad di 100 mientras cu 7 candidato di PPA no a logra mas cu 50 voto.

E otro partido ta partido POR c'un total di 16 candidato di cual e lider Alan Howell tabata e unico cu a supera e cantidad di 100 voto y e sobra 15 candidatonan di POR, no a logra supera 50 voto.



Partido Accion21 a presenta un lista di 14 candidato e lider Mansur a logra e cantidad di 2019 voto, sigui pa Daphne Lejuez cu 500 voto pero for di nan dos, solamente dos mas a supera e total di 100 y tabatin 7 candidato cu no a haya mas cu 50 voto.

Partido UPP a presenta un lista di 13 candidato caminda solamente dos candidato a haya mas cu 100 voto, nueve cu no a pasa e cantidad di 50 voto mientras cu RAIZ a presenta un lista cu 12 candidato cu dos candidato cu a haya mas cu 1000 voto, uno cu a pasa 600 voto, 2 a haya 200 voto, uno 150 voto y 4 candidato a keda bou di 100 voto.

Partido MAS c'un lista di 7 candidato, a impone pa medio di su lider Marisol Tromp kende a logra 4191 voto total y un otro candidato a supera e total di 100 voto y e otro cinco candidatonan no a logra di supera e total di 100 voto.

HTC a presenta un lista di 6 candidato caminda uno solo a logra mas cu 100 voto y e otro cinco candidatonan no por a logra supera e barera di 30 voto, mesun situacion partido Curpa cu a presenta lista di 8 candidato caminda un solo candidato a haya mas cu 100 voto, 7 no a supera 35 voto di cual grupo 5 no a supera 10 voto.

Pues no ta un cuestion di haya candidato pa subi lista pero sin duda di haya personanan cu lo por convence pueblo votado pa sostene e partido riba cual nan ta aparece!

Pa loke t'e dos partidonan grandi, MEP cu su lista di 29 candidato, cinco no a pasa e cantidad di 100 voto personal mientras cu partido AVP for di 29 candidato, 8 no a supera e cifra di 100 voto.